

## CHEZ PLAINEUX DE TOUBAQUE

Mi qui su pu très jeune, forchémain , heusse su d'trinte trop , j'va vous raconter l'vie d'chez plaineux de toubaque .

Pour faire euch'métier là , fallo hein'sacrée patienche . Chez p'tites graines, y zalottent les quer à Lille , à l'régie d'chez toubaques ; et chéto à hein'graine prés , à cause de l'frode ! Cha ! pars'qui n'avo de l'frode Savez !

Après l'hiver , quin l'soleil y moute heul'bout d'sin nez , fo busié à cheule couche et à ch'ingrais . A vin , un méto pas du nitrate comme à ch'heurre , mais du crottin d'quévos . je vous dit pas l'boulot ! Mi qu'iéto gamin , j'couro pour ché plaineux derrière heul'cul d'chez gwos et tout cha pour un chuque .

Mais revenons à nos plaineux . Pou s'mé , y prenottent chez p'tites graines din leu do , et y les léchottent quer din l'terre bin fine ; un co d'arrosor , chez cassis eu d'seure , et un attin qu'cha pousse .

Heinne paire de s'maines pu tard fo busié à plinter . Un prin che l'quaine à maillons pour avor heulle distinche intre chez pi . Le 'vla parti avec ch'eule caisse toute pleine et sin plintoir . A ch'teur chez des machines , mais là y fallo toudi s'abachi ! j'vous dit pas min dos .

Et v'là ch'toubaque plinter , tout du chemin y va pousser . Au bout d'in momin y faudra y copper s'tiète pour l'impécher d'graindir . Un même tin y va quezir chez feuilles qui va garder . Un principe y n'avo sept , deux un haut qui se r'dréchent , deux à gauche de ch'croc , et tro à drotte . A cause de l'frotte , tout iéto compté .

Un va léché tout cha grindir jus'qu'à septmbre ; bin sur inter de y faudra inlever chez ch'tons , savez ché comme chez pi d'tomates , faut inlever tout ch'qui pousse su ch'croc tout prés d'chez feuilles .

A la fin de l'été chez feuilles y font béto un métre eu d'long et épaisses comme heum main . Mais à ch'momin là y a souvin d'zoraches ; y n'avottent un peur bleue . Aveuc chez grélles y iavo quéque fo des tros comme heu d'zoeux d'coulons . Y resto pu qu'à tout r'tourner aveuc un carrue .

Tout cheux qui sont passés à coté de ch'orache , y vont imbocher des gins pour comincher à coper chez feuilles et à l'zinfiler sur heinne fichelle , avec un n'avé à chaques bouts pour les pintent et les faire réchuer . Qu'in j'dis un n'avé chez po heinne rape mais un bout d'bo comme un crochet .

Un bon copeu ! ch'ti qui rintro dun ch'croc pour faire un bielle tiète à cheul'feule pou quelle tienne su l'fichelle , Y pouvo copper 4000 pis par jour .

Un coupo toudis deux routes à l'fo , et un poso chez feuilles délicatemin su l'route eu d'gauche intre chez pis . Un'paires d'heures pu tard quin chez feuilles y qu'minches à ramollir , un les ramasso . Aveuc sept tas un faigeo un mort , un appello cha-des bachons . Aveuc eusses , un fageo heinne lonque line , un dijo un rolle . Pour poser ch'toubac , eud'vant , un coupo chez crocs aveuque heinne ho pour po abeumer chez feuilles .

Alors chez l'boulot d'chez femmes qui cominche . Assis sur un sa avec de l'courte paille , y vont infiler cha avec le grainte aiguille , Euch'fil , heinne filache qu'un dijo , fageo un bon mète eud'long et un avé ach'bout .

Ch'infileusse , al' devo mète un do d'écart intre ché feuilles , et , heinne fo arrivée au bout loyer un aute avé un fegeant un < lache > . Tout cha intre sept heures du matin et sept heures du sorr , un plus y mingeottent su plache avec le mains bin norres . J'va vous dire un truc , revenues à le mageon y les récurottent avec des feuilles d'oseille de ch'cardin . Eule'jus chéto l'décapant , sinon pas moyen d'les nétiller .

A la fin de l'journée un veillo v'nir ch'attellée d'quevos sacant l'plate'forme pour amener cheule récolte à s'échoir . Eusse'séchoir , cha aussi chéto heinne sécot , l'hiver, inter de , y fallot faire des paillassons pour pu tard intourrer heu séchoir et mûcher ch'toubac pindu sur un fil de fer .

Alors un va commincher à surveiller l'guernouille , quin yavo un nuache un vue !! Abile faut pousser s'invillées l'heinne conte l'ote et les mûcher avec chez paillassons . Tout duchemin chez feuilles y jaunissent !! Pour qui soche réchué comme'y faut , un devo atinte heinne paire de s'maines . Heu j'louve , je l'ferme , je r'cominche , mais toudi un fégeant atintion qui mosich'te pas .

Un jour un vo qu'cheulle récolte est bin sec , et surtout d'heinne belle couleur marron . Alors un va l'rinter sur heinne baladeusse , heinne carrette à bras si te préferres , forchémin , à ch'teurre y pese pu bin lourd .

Tout du chemin un va qu'mincher ch'tri sélectif comme y distent ach'teur à l'communauté hurbaine . Sur un grande tape un met chez feuilles un mont et un y va ! heinne lonque , heinne courte , heinne épaisse , heinne bien marron , heinne plus claire , heinne troée . Après un les r'prin , un les comptes , et un en fait des manottes ( chez des p'tites bottes quin lient avec heinne feuille un d'sous de l'tiète . Et cha tous les jours ch'cas Noel . J'allo oublié d'vous dire , chez nanottes y fallo l'zégaliser avec un coutiau , du côté d'cheule tiète , pou qu'cha fache plus bio .

Y va éte tin d'eurre tenir sin tour pour euche'bottelor ( chez heinne sorte eu d'moule ) pour ringer chez manottes . Pour éte payé , ya ch'poids mais y à aussi l'présintation et l'état d'chez feuilles . Plus ché bio pu qu'teu gagne , heulle'maximun chéto 4 su 4 .

Un matin d'bonne heurre , v'la ch'attellée d'quevos qui s'améne pour aller à Lille porter ch'toubac . Qué frousse ! Savor combin qu'un va avor ! Chez pire que l'salaire eu d'la peur . Du momin qu'un ganne assez pou vif l'année qui vient . Arrivés à ch'dépôt un attin sin tour . Chez à nous !! Tout penaud un attin le décision .3 su 4 ! Super un diro à ch'teurre ! Un va pouvoir faire goguette un rintrant , et printe un bonne pronne avec heulle'zottes plintoux .

Après , tout berloquant , un pourra rintrer à s'mageon et r'comincher l'année qui vient pour nourrir eu s'petite famille et satisfaire tous chez < finqueux >

**QUE VIE !**

François LEIGNEL Août 2004